



## CONCURSO – EXPOSICIÓN LETRAS GALEGAS 2010

A Secretaría Xeral de Política Lingüística, con motivo do Día das Letras Galegas, convoca un concurso para a elaboración dunha exposición sobre a obra, época e lingua do autor homenaxeado en 2010, Uxío Novoneyra, e/ou sobre a situación sociolingüística da etapa histórica en que este viviu.

### **Obxectivos:**

1. Potenciar o estudo da obra e da época de Uxío Novoneyra.
2. Propiciar a reflexión sociolingüística sobre esta etapa histórica.
3. Fomentar a valoración das contribucións individuais e colectivas na dignificación e normalización da lingua galega.
4. Impulsar a realización de actividades que fomenten a colaboración interdepartamental e que potencien a implicación activa do profesorado e do alumnado.
5. Fomentar e difundir unha visión persoal por parte da comunidade educativa sobre a figura deste autor.
6. Enriquecer a oferta de materiais existentes en lingua galega, promovendo a súa divulgación como referentes para outros centros.

**Bases:**

1. Poderán participar todos os centros de ensino non universitario de titularidade da Consellería de Educación: públicos e privados, escolas unitarias e de ensino primario, centros rurais agrupados, centros de ensino secundario, centros integrados, escolas oficiais de idiomas, centros de educación de adultos...

2. Establécense dúas categorías: a) Centros de educación infantil e primaria; b) Os restantes. Os centros educativos nos que se imparta educación infantil, primaria e secundaria poderán concursar nas dúas categorías.

3. A mellor exposición de cada unha das categorías será imprimida e distribuída en máis de 2.000 puntos de Galicia e do exterior, como centros de ensino, centros de estudos galegos, centros da emigración, bibliotecas municipais e casas da cultura, entre outros. Nela figurarán o logo da Secretaría Xeral de Política Lingüística e o nome do centro gañador.

4. Os grupos de traballo que elaboren as exposicións gañadoras recibirán cadanseu premio en metálico por un importe de 4.000 €.

5. Os premios poderán, se a calidade dos traballos presentados non fose a axeitada, declararse desertos.

6. O eixe temático da exposición será a obra e a época de Uxío Novoneyra, observada dende unha perspectiva pluridisciplinar e onde o percorrido biográfico sexa só un motivo para abordar unha realidade complexa e heteroxénea.

7. O traballo será interdepartamental e na súa elaboración deberán estar implicados un mínimo de cinco seminarios. No caso dos centros de educación primaria, terase en conta a participación dos equipos de distintos ciclos.

8. Valorarase especialmente a inclusión de actividades dirixidas a distintos ámbitos de coñecemento, ademais das correspondentes aos seminarios implicados.

9. A exposición constará de 15 carteis de 70 x 100.

10. A técnica para utilizar é libre e os traballos poderanse presentar a toda cor.

11. Para cada cartel elaboraranse unha serie de actividades que guíen a súa observación e que fomenten o labor de investigación do alumnado. Xuntaranse á exposición en forma de guía ou cuestionario e a súa extensión non superará as 25 páxinas.

12. Os traballos entregaranse en formato dixital .pdf ou .jpg, cunha resolución entre 72 e 100 píxeles/polgada, modo de cor cmyk, acompañado da reprodución impresa dun dos carteis, no Rexistro Central da Xunta de Galicia, nos das súas delegacións provinciais ou por calquera dos medios previstos no artigo 38.4 da Lei 30/1992, do 26 de novembro, de réxime xurídico das administracións públicas e do procedemento administrativo común. Presentaranse baixo un pseudónimo ou lema identificador. Os datos do centro e os do grupo de traballo introduciranse nunha plica. No exterior desta figurará unicamente un pseudónimo ou un lema da exposición.

Os traballos que resulten premiados deberán ser reenviados á Secretaría Xeral de Política Lingüística en formato dixital .pdf ou .jpg, cunha resolución de 300 píxeles/polgada.

13. O prazo de presentación remata o día 8 de febreiro.

14. A Secretaría Xeral de Política Lingüística quedará eximida de calquera responsabilidade derivada do plaxio ou de calquera transgresión da lexislación

vixente en materia de propiedade intelectual na que poidan incorrer os/as participantes.

15. A Secretaría Xeral de Política Lingüística resérvase o dereito a organizar exposicións e/ou a exhibición, reprodución ou publicación da imaxe ou contido dos traballos presentados por calquera medio que se considere oportuno, sen máis limitacións que as derivadas do Real decreto lexislativo 1/1996, do 12 de abril, polo que se aproba o texto refundido da Lei de propiedade intelectual.

16. A Secretaría Xeral de Política Lingüística poderá desenvolver as accións que considere oportunas encamiñadas á difusión dos traballos seleccionados das categorías incluídas nesta convocatoria.

17. A participación no concurso implica a aceptación destas bases. A Secretaría Xeral de Política Lingüística queda facultada para dirimir calquera controversia derivada da interpretación das bases. O ditame do xurado será inapelable.